



Potere al Popolo hautagaitza

ESPERANTZA IZPI BAT EZKERRARENTZAT ITALIAKO HAUTESKUNDEETAN



Xuban Zubiria Elexpe

@xubanzubiria

ARGAZKIA: POTERE AL POPOLO

Italian ospatzear diren hauteskunde orokorren atarian, zenbait mugimendu sozialen erraietatik fenomeno politiko berria sortu da, Potere Al Popolo. Krisiak eta prekarietateak gogor kolpaturiko italiarren ahotsa izan nahi du martxoaren 4ko hauteskundeetan.

- » Egun gutxitan hauteskundetara aurkezteko beharrezkoak zituen 25.000 sinaduren hirukoitza lortu zuen Potere al Popolo-k
- » Martxoaren 4an Italiako ezker eraldatzailearen erreferente bakar gisa aurkeztu da Potere al Popolo
- » Italiako eragile sozial andanaren babesa izanik ere, inkesten arabera zail izango du Carofaloren zerrendak parlamentuan sartzeko botoen %3ko langa gainditzea

Abenduan Sergio Matarella Italiako Errepublikako Presidenteak parlamentua disolbatu eta hauteskunde orokorrak deitu zituen. Italiako ezkerrentzat hauteskunde hauek badakarte berritasunik, aipagarriena Potere al Popolo zerrenda herritarraren agerpena izan da. Egun gutxitan hauteskundetara aurkezteko beharrezkoak zituen 25.000 sinaduren hirukoitza lortu ostean, inork espero ez zuen bezala sartu da mugimendua hauteskundeetan lasterketan.

Alderdi tradizionalen izaera eta egiturarik gabe, Napolin sortutako herri inizatiba aparra bezala zabaldu da Italia osora. Proiektuaren lema eta zerrendaburua Viola Carofalo aktibista napolitarra da. Alderdi komunistaren hauteskundeetarako hautagaitzak po-

rrot egin ostean, martxoaren 4an Italiako ezker eraldatzailearen erreferente bakar gisa aurkeztuko da Potere al Popolo.

Egunotan ezkerreko zenbait pertsonaia ezagunek babesa adierazi diote Carofaloren zerrendari. Horien artean daude Ken Loach zinemagile famatua edo Paolo Sollier futbolari ohia, besteak beste. Hurrengo egunetan Napoliko alkate Luigi de Magistris-ek eta ezkerreko hainbat pertsonaia esanguratsuk Potere al Popolo-ren aldeko bozka eskatzea espero da.

Italiako eragile sozial andanaren babesa izanik ere (No TAV!, USB, CGIL...), ikusteko dago zerrenda herritarrak parlamentuan sartzeko lortuko duen. Parlamentuan ordezkari izateko hauteskunde lege berriak exijitzen duen bozken %3a gainditzea zaila izango dute. Italiako hainbat hedabidetan argitaratutako inkesten arabera, botoen %2-%2,5 eskuratuko luke hautagaitza berriak.

“Espero den abstentzio handiaren ginetik, inoiz bozkatzen ez dutenengana iritsi eta estatuarentzat ikusezin bihurtu diren horiek ere konbentzitu nahi ditugu”, zioen Carofalok La7 telebista kate italiarrari eskainitako elkarrizketan. Ezkerreko hautesle goaren babesa eskuratzeko bidean, aurrean izango ditu Bost Izar Mugimendua (M5S), orain arte gobernuan egon den Matteo Renziaren PD alderdia eta Pietro Grassoaren Liberi e Ugali alderdi sortu berria.

Zentro-ekzerra zatitua

Zentro ekzerra zatituta iritsi da 2018ko hauteskunde orokorretara. Azken legegintzaldian gobernuan egon den PD alderdiak zuzendutako austeritate politiketik arrakalak eragin dituzte sozialdemokrazian.

Haustura horren ondorio politikoe-tako bat, Pietro Grasso buru duen Liberi e Ugali alderdiaren sorrera izan da. Lehen ministro ohi eta PDko buru Matteo Renziaren hautagaitzak, zentroko hautesle goa bereganatzeko, bere mezu nabarmen moderatu du. Bitartean Liberi e Ugali mugimendua ezkerreko botoa monopolizatu nahian dabil, PD-k eskuinaren tesiak besarkatu dituela argudiatuz.

Iragarpenak txarrak dira bi alderdientzat. Ikusteko dago martxoaren 4aren ostean irekiko den eszenatoki berrituan

alderdiek zein bide hartuko duten. Zentro-ekzerraren krisia probestu dezake Potere al Popolo-k bere freskotasunaren aldarria egin eta ezkerreko benetako alternatiba bezala agertzeko gizarte italiarraren aurrean.

Bost Izar Mugimendua (M5S)

Beppe Grillo komediagileak sortutako M5S alderdia indartsuen agertzen da inkestetan eta lehen indarra izateko aukera asko du. Halere, ezinezkoa izango du gobernurik eratzea beste alderdi nagusiren batekin akordiorik lortu ezean. Grilloren alderdiak eta PD-k osaturiko gobernuaren aukera, egun urruti atzetan da.

M5S-k sorreran aldarrikatutako balore ezkerretatik urrun, azken urteetan immigrazioaren aurrean agerturiko jarrera atzerakoiek faktura pasa diezaiokete bere boto emaleen aurrean. Are gehiago pasa den astean Maceratta hirian eskuin muturreko militante bategen etorkin afrikarren aurka egindako atentatuak sortu duen haserrearen ostean. M5S-ren diskurtso populista arriskutsua salatzea izango da Potere al Popolo-k martxoaren 4 bitartean izango duen beste erronketako bat, ezkerreko botoaren zati bat bereganatu nahi badu behintzat.

Eskuina eta eskuin muturraren aliantza

Aliantzak beharrezkoak izango diren eszenatoki honetan, gobernu osatze-ko aukeren artean indar handien hartu duena eskuineko hainbat alderdik osaturikoa litzateke. Berlusconiaren Forza Italia, Lega Nord eta Fratelli di Italia alderdi xenofobo baturak eskuineko gehiengo parlamentarioa osatzea ekar lezake. Hortik gobernu eratu den edo ez, ikusteko dago.

Hauteskundeetako emaitzei beldurrik izan gabe, Potere al Popolo-ren sorrera, Italiako mugimendu sozialek azken urteetan bizi duten ahalduzko giroaren seinale da. *Actual local, think global* filosofiaren barruan, Napoliko auzo asanblada bateko ideia hauteskunde orokorretan alternatiba izan nahi duen tresna bihurtu da. Emaitzak emaitza, ez da makala Italiako eragile sozialek hilabete gutxiren buruan lortutakoa. Hauteskundeetan ostean ere eta gobernuari itxaron gabe, esperientzia hau sostengatu duten eragileek herrigintzan jarraituko dute. ■